

HEADQUARTER'S STAFF GENERAL MEETING

WEDNESDAY 16TH JANUARY 2019

Minister's Message

Sekreter Prensipal

Manm Management Minister

Direkter

Staff Minister

Bonzour.

De lapar Management Minister Ledikasyon ek Devlopman Resours Imen mon swet zot tou en Bon lannen 2019.

I fer mwan en tre gran plezir pour akey zot tou pour nou premye miting pour sa nouvo lannen. Mon ti ava kontan eksprim mon lapresyasyon e gratitid pour travay dir ek sipor ki zot in donn nou Minister pandan lannen 2018.

Mon ti ava kontan profit sa lokazyon pour mwan remersye tou manm staff ki pe pran zot retret ouswa ki pe kit nou pour al travay ayer, mersi pour tou zot bon travay ek kontribisyon ki zot in fer anver devlopman ek progre nou Minister.

Pour bann travayer ki'n fek zwenn nou Minister, mon swet zot labyenveni e bonn sans dan zot nouvo responsabilite.

La ki nou'n konmans en nouvo lannen, i sertenman apropiye pour nou reflexir lo nou bann lakonplisman ek defi ki nou'n fer fas avek an 2018.

En nouvo lannen pour en travayer i vedir nouvo komansman, nouvo determinasyon pour koriz bann febles lannen presedan e double zefor pour vin pli prodiktiv. I osi vedir en nouvo loportinite pour fer bann sanzman personnel pour annan en pli bon latitud dan travay ki ava permet nou donn le meyer de nou menm pour fer nou Minister vin pli performan.

Mon annan plezir pour mwan partaz avek zot lakonplisman nou Minister pour lannen pase e osi nou plan pour lannen 2019.

Lannen pase pa'n en lannen fasil avek sanzman Minis ki'n arive ver milye lannen, me mon kontan pour dir, ki nou'n arive akonplir bokou malgre serten defi. Sa i'n posib gras a langazman bokou manm staff ki'n met zot travay an premye.

1. Lakonplisman Mazer 2018

1.1 The Medium Term Strategic Plan 2018-2022

Nou Minister in reisir konplet son plan Stratezik pour sa prosen senk an (2018-2022). En plan stratezik i tre enportan pour Minister parski i en gid ki diriz bann aksyon ek bann desizyon mazer pour anmenn transformasyon ek progre dan ledikasyon ek formasyon e pour asire ki nou prodwir bann mende kalifye e kapab ki lasosyete i bezwen.

1.2 Revision in the Teachers' Scheme of Service

Minister in kontinyen enplimant Scheme of Service pour ansennyan par faz. Nouvo Scheme in ganny entrodwir pour lezot kad tel ki: driver, wardens, General

Assistants. Revizyon in osi ganny fer dan scheme pour travayer Stores. Travay pour reviz Scheme librarians, Laboratory technicians ek Counsellors in deza konmanse e i ava terminen sa lannen.

1.4 The Ministry's Organisational Structure

Travay lo en nouvo striktir Minister in konplete an 2018. Minister pe konmans enplimant sa nouvo striktir an Zanvye 2019. Anba sa striktir nou annan kreasyon nouvo divizyon ek seksyon tel ki: –Divizyon responsab pour TVETE (Ledikasyon Teknik, Vokasyonnel ek Antreprenaya anba responsabilite Mr. Jean Alcindor: Seksyon pour Zesyon bann ansennyan i anba responsabilite Mr Alex Souffe, Divizyon lekol in prezan vin de divizyon: Divizyon responsab pour Ptit Anfans ek Primer anba direksyon Mr. Cyril Pillay ek Divizyon responsab pour Ledikasyon Segonder anba responsabilite Ms Odile Octave. Fonksyon Sant Curriculum ek Teacher Support (CCATS) in prezan ganny entegre avek fonksyon sa de divizyon ki responsab pour bann lekol.

1.5 Cabinet Decisions 2018

Pour lannen 2018, nou Minister i prezant en total 11 polisi mazer pour laprouvasyon Konsey Minis e zot tou in ganny aprouve. Travay i an progre pour enplimantasyon sa bann polisi tel ki:

- Letablisman lekol teknik/TVET lo lil Soleil Lans o Pen
- Bann stratezi pour siport bann etidyan segonder dan zot laprantisaz ek formasyon teknik pour posibilite en lanplwa
- Regilasyon pour Kontra Sosyal
- Regilasyon pour admisyon bann etidyan enternasyonnal dan nou bann lenstitisyon edikasyonnel
- Gid Nasyonnal pour lenplimantasyon “Recognition of Prior Learning” (RPL);
- Polisi Nasyonnal pour Devlopman Resours Imen ek son Stratezi 5 an
- Lentrodiksyon Relief Teacher Scheme pour ranplas bann ansennyan ki lo konze medikal ant trwa a sis mwan

- MoU avek Zambia pour rekritman bann ansennyan
- Propozisyon pour en Polisi lo repetisyon laklas
- Propozisyon pour redwir serten nonm size dan Lekol A'Level Studies
- En model collaborative ant Minister Ledikasyon ek Resours Imen ek Minister Lapes ek Lagrikiltir , transfer Seksyon Resers Minister Lapes ek Lagrikiltir e osi met an plas en Steering Committee pour sa Sipor Kolaborativ.

1.6 Public Meetings

En seri miting piblik rezyonnal ti ganny organize pour Minis ek son tim retourn kot piblik e rann kont lo progres ki Minister in fer dan lenplimantasyon bann rekonmandasyon ki piblik ti fer dan miting piblik 2017. Randevou pour lot seri miting i an Novanm 2019.

1.7 Formasyon staff

Minister i kontinyen met bokou lanfaz lo devlopman profesyonel e formasyon bann ansennyan. En group plis ki 200 ansennyan primer ti konmans zot formasyon kot lenstiti SITE an 2018. I enportan note sepandan ki

lo nivo staff Headquarter i osi annan tavayer ki pe swiv formasyon anliny avek Training Plan nou Minister.

2.0 Nouvo Linisyativ pour 2019

Aprè en revè travay 2018, pandan lannen 2019, Minister pou enplimant serten nouvo linisyativ dan son zefor kontinyel pour anmenn plis devlopman ek lamelyorasyon dan sistenm ledikasyon.

2.1 Officialising the MTS 2018-2022

Dan premye kar 2019, nou pou ofisyelman lans nou nouvo Plan Stratezik 2018-2022. Nou plan stratezik i nou gid pour sa prosen senk an. Tou divizyon pe an semoman devlop son prop plan anliny avek Plan Stratezik Minister. Mon ti ava kontan lans en lapel avek staff pour zot travay dir pour ki zot plan i ganny enplimante dan en fason efektiv.

2.2 Second International Biennial Conference on Early Childhood Care & Education

Apartir le 21 ziska 23 Fevriye 2019, nou pei pou akeir 60 delege enternasyonnal lo son later pour vin partisip dan dezyenm Biennial Conference Enternasyonnal lo Early Childhood Care & Education anba tenm “ Big Data for Small Children: Monitoring the Holistic Early

Childhood Development. Lenstiti pour Devlopman Ptit Anfans, ki en lazans anba nou Minister, an kolaborasyon avek lezot sekter i annan sa responsabilite pour organiz sa Konferans an partenarya avek Biro Enternasyonal pour Ledikasyon an UNESCO. Nou zot IECD ek son tim bonn sans.

2.3 Launching of the Leadership Management Framework

Ver konmansman mwan Avril, Minister i ekspekte lans Leadership Management Framework ki en zouti tre enportan dan demars ver desantralizasyon lotorite ek responsabilite kot nou bann lenstitisyon edikasyonnel. Sa kad i ava fasilite en meyer zesyon ek gouvènanans bann lenstitisyon edikasyonnel. I ava osi promouvwar latransparans ek accountability dan zesyon ek gouvènanans bann lenstitisyon. Sa i ekspekte amelyor lefikasite dan lansennyman ek laprantisaz

2.4 The Social Contract Regulation 2017

Travay i an progre pour Minister konmans lenplimantasyon Regilasyon Kontra Sosyal ki ti ganny aprouve par Konsey Minis lannen pase. Sa regilasyon i ava permet ki paran, responsab lekol, ansennyman ek etidyan a vin pli responsab e 'accountable'dan zot

responsabilite parey in ganny preskrir dan lalwa. Minister i ekspekte ki sakenn i zwe son rol byen afen ki nou arive reisir dan nou demars pour donn bann zanfan Seselwa en ledikasyon de kalite.

2.5 Teachers' Council of Seychelles

Pour 2019, Teachers' Council of Seychelles pour konmans fonksyonnen ofisyelman. Travay I an progre pour asire ki tou bann striktir nesese I an plas pour son loperasyon. Teachers Council pour asire ki tou ansennyan ki pe pratik lansennyan I ganny anrezistre.

2.6 Capital Project 2019

Minister pou kontinyen enplimant bann proze Kapital dapre son bidze. I enportan note ki Divizyeon responsab pour bann proze in rekrit bann eksper Kenyen (4 antou) pour fasilite lenplimantasyon bann proze. Pour sa lannen nou ekspekte konplet:

- blok laklas kot lekol Grand Anse Praslin Primer ek Segonder
- Premye faz travay lo lekol primer Perseverance South;

- Premye faz rekonstriksyon lekòl La Digue
- Rekonstriksyon lekòl Belonnie segonder
- Konmans rekonstriksyon lekòl La Rosiere
- Konplet proze lekòl Cascade primer
- Konmans rekonstriksyon Sant Profesyonnel pou Lagrikiltir ek Ortikiltir (SIAH)

3. Konklizyon

Konman en Minister nou apresye progre ki nou'n fer an 2018, sepandan, nou osi realize ki lasosyete pe ekspekte bokou plis avek nou. I vre ki nou pa pe travay dan lekòl e petet nou pa pe santi lenpak, ouswa ganny afekte direkteman kan en lekòl I fel, kan en etidyan i drop out, kan en paran I 'assault' en ansennyan, kan en manm piblik i ensilte Minister lo facebook ouwa dan zournal akòz en zofisye dan Minister in mal koz avek li ouswa pa'n donn li en bon servis. Ser travayer, I annan en kantite legzanp, en senp fot ki nou fer i sifi pou tarni repitasyon nou minister.

- Bann rapor/konplent piblik nou bezwen pran o serye.

- Nou'n tann bokou koz lo koripsyon/pran larzan, donn servis pour en faver. I pe ariv menm dan bann Minister. Annou fer fason ki en tel keksoz pa ganny pratike dan nou Minister pour gat son repitasyon. Dan travay ki nou fer, i annan bokou loportinite pour fer sa, menm annou pa tonm dan sa pyez, pa ganny tante. Fer nou travay avek fairness, disiplin e bonn volonte.
- Annou travay dapre sa trwa prensip ki nou Prezidan in adopte, Latransparans, Rann Kont e Bonn Gouvernans.
- Bann sef departman, divizyon, seksyon annou fer lannen 2019, en lannen kot nou landrwa travay i vin pli performan, pli prodiktiv. Annou met an plas en bon sistenm monitoring, travay lo target e fer en bon swivi. Pour sak kar lannen zot bezwen fer en rapor lo zot progre.
- An 2019 nou bezwen annan en bon sistenm kominikasyon ant departman, divizyon, seksyon me osi avek lekol, lazans an deor e piblik an zeneral. Nou pou al met an plas nou plan lenformasyon, kominikasyon ek ledikasyon (ICE)

Pandan lannen 2019, mon ti ava kontan ki sa moto, "education is a shared responsibility" ki nou'n adopte i ganny pratike dan tou seksyon/divizyon/younit nou

Minister. Nou tou ki la nou pe kontribye pour edik bann etidyan. Sa i nou misyon. Nou bann lekol i bezwen nou sipor. Annou travay pli dir ankor pour lavansman nou Minister. Ledikasyon i en partenarya, pli sa partenarya i for, son lenpak i ava pli for lo nou bann lekol ek sosyete an antye.

Ankor enn fwa mon ti ava kontan eksprim mon gratitid a tou bann travayer pour zot devouman dan zot travay. Mersi pour zot prezans. Rapel byen, Ledikasyon i en responsabilite partaze.

Mon swet zot tou en lannen byen avek prosperite.

Mersi.